

四庫全書

史部

欽定四庫全書

江西通志卷八十三

人物十八

建昌府

南北朝

周迪臨川南城人少有勇略梁元帝時授高州刺史封
臨汝縣侯領臨川內史侯景之亂百姓多棄為盜迪
保境恤民所部獨不侵擾臨川郡尸而祝之

安志

唐

危全諷南城人乾符末所在寇亂全諷聚衆保鄉里中和間詔為撫州刺史招懷亡叛百廢具興為人倜儻有大節博涉羣書愛敬賓客善撫士卒賞罰必當其功罪士卒樂為之用追封南庭王

人物志

危仔昌全諷弟歷官新撫饒信四州刺史黃巢黨黃可思竊發擾害鄉閭初戰弗克後復陳師鞠旅一戰却之

林志

後五代

元德昭字明遠仔昌子以危字刀下有厄改姓元居家孝友事吳越掌文翰用兵於閩機務悉以委之厚重多謀有輔弼才師旅戒嚴議者盈庭德昭至則他論自息累官至丞相贈太保

林志

宋

曾致堯字正臣南豐人李氏有江南撫州上致堯進士第一不就太平興國八年乃舉進士召見拜著作佐

郎知淮陽軍留直史館除祕書丞兩浙轉運使魏庠
知蘇州介舊恩以進致堯劾之上曰曾某乃敢治魏
庠可畏也言苛稅一百三十餘條罷之移知壽州轉
主客貲外判三司鹽鐵勾院遷戶部貲外京西轉運
使歷知東泉蘇揚鄂五州終戶部郎中所著仙臈羽
翼三十卷廣中台志八十卷清邊前要五十卷西郵
紀要為臣紀要三卷直言集五卷文集十卷傳於世
尤長於歌詩云

王荆公臨川集

按曾致堯子固之祖也人物志林志以為五代時人載入撫州又入建昌兩處重見今據王介甫所撰墓志節錄改正南豐縣今屬建昌府宋史稱撫州南豐者宋之建昌軍自撫州分置也

原跋

曾易占字不疑致堯子以蔭補太廟齋郎為宜黃臨川二縣尉舉三法司中進士第改武勝軍節度掌書記不往用舉者遷太子中允太常博士知如臯玉山二縣被誣歸卒子六人譽輩牟宰布肇始易占以文章

有名既仕不合即自放為文章而時議十卷尤行於

世

同上

按曾易占以子貴贈魯國公林志失載白志采荆
公所撰曾太常墓志增入

陳彭年字永年撫州南城人幼好學母惟一子愛之禁
其夜讀彭年篝燈密室不令母知太平興國中舉進
士調江陵司理叅軍真宗即位上表言事召試遷祕
書丞景德初直史館兼崇文院檢討獻大寶箴預修

冊府元龜遷右正言數有建白進工部郎中加集賢
修撰遷諫議大夫兼祕書監同修國史真宗奉祠太
清宮丁謂為經度使以彭年副之國史成遷工部侍
郎叅知政事求罷不許卒年五十七贈右僕射謚文
僖彭年性敏給博聞強記貴至通顯所得俸賜惟市
書籍大中祥符間附王欽若朝廷典禮無不叅預所
著文集百卷唐紀四十卷

宋史

危拱辰字輝卿南城人淳化進士性純孝年十五代父

為吏題新月詩云未審初三月嫦娥怨阿誰嬾開十
分鏡祇畫一邊眉邑令見而異之命拱辰專儒業後
官至光祿卿

林志

鄧希顏字子臯南豐人咸平進士累官大理司直魚侍
御史以謹論為真宗所信重

同上

江白建昌人景德進士父禹錫有節義高年不仕躬自
教授祥符初獻東封詩十五篇有詔嘉美賜以粟帛
歲時遣使存問五年卒白自鄆尉罷還負土營葬廬

於墓側藜羹芒屨晝夜號泣將終制猶然轉運使以
其狀聞詔賜帛十二足粟麥二十石醪酒十缸宋史
按江白前志重見南康府人物蓋疑以為建昌縣
也今據府志存此削彼

吳奎字成象南城人六歲能歷覽子史五行俱下目不
再覩大中祥符二年與臨川晏殊應賢良詔時年十
一真宗甚優異之三賜璽書

林志

危祐字夢弼南城人天禧進士知邵州使者按部有所

求祐置笏曰某不敢擾民以固位請遂歸尋遷太學
博士以言抵宰相謫守廉州吏進聚珠扇歎曰身為
廉州守而執此扇以對吏民獨不愧州名乎却之人

物志

黃曉南城人大中祥符進士流落銓調二十年嘗謂大
丈夫立世當自奮拔豈可碌碌出人門下通判廬州
轉運使陳杲以威懾下吏有訟杲者朝廷遣曉鞠之
人皆危曉謂屬部勢不可問曉治之以理略不為意

識者嘆服累官至職方員外郎

明一統志

蔡充字公度南城人天聖進士家貧刻苦養母及仕未嘗廣田宅喪歸僦屋以居仕至羣牧判官司封負外

郎林志

過昱字彥明南城人寶元進士性至孝母沒刻木為像事之父一日大慟昱驚問故徐曰無他念吾事爾祖自謂已盡禮今見兒事吾始覺猶未盡故感悔而悲耳及父沒水漿不入口者七日孺慕終身

同上

危固字堅道祐之子少好學以孝廉聞推先澤甘為庶人作隱居詩以見志有數間玉川屋七里子陵灘之句薦除將作監主簿召試館職皆不就

同上

蔡冠卿字元輔充之子慶厯進士為原武簿遷下邳宰鄆陵所至有惠愛遷大理少卿出知饒州前此范文正公謫饒其去也人畫像祠之冠卿罷民亦畫像配范祠焉

人物志

李觀字泰伯建昌軍南城人穎悟過人五歲能調聲律

習字書十歲通舉子業家貧竭力養親不慕榮利倡
立盱江書院所學以推明聖經為本不泥於漢唐諸
儒之說獨不喜孟子嘗曰孔子尊王孟子乃勸諸侯
叛王故作常語其間多毀孟子郡舉茂才異等有旨
召試及試六論不得其一觀語人曰吾於書無不讀
此必孟子註疏也擲筆而出罷歸益務博學稽古范
仲淹守饒州得其文薦於朝以母老不願仕乞就除
一官以便養并上其所業二十四篇不報皇祐二年

仲淹又與余靖交章薦之乃授太學助教召為說書
明年又以海門縣主簿祿之胡瑗以疾罷以觀權同
勾管太學以祖母未祔先塋請假歸遷葬尋卒所著
有平土書禮論七篇易論十三篇周禮致太平論五
十篇明堂定制圖一卷富國強兵安民策各十篇潛
書十五篇廣潛書十五篇慶厯民言三十篇常語三
卷門人自閩浙至著錄者十有餘人鄧溫伯最顯溫
伯為御史中丞上覲所著書且請官其子參魯朱晦

庵嘗謂觀之學得於經為多又言其禮論與己意合
獨毀孟子世或譏其偏云

椒丘集

按李觀所著尚有退居類藁皇祐續藁後集

鄧立字公儀南城人與李觀同學志合道一長於文辭
事父母孝謹撫弟友愛服義疾惡意所不可雖親戚
多引繩墨彈直斥絕浮屠說不使汙其門觀以畏友
稱之

李泰伯集

謝思聖字心道南豐人孤貧力學事後母孝為里醇儒

慶厯登第調寧都主簿適隣寇猖獗思聖食息城上
為守備計寇去轉掠石城思聖復攝令民賴以安

林
志

曾叔卿建昌南豐人輩族兄也嘗買西江陶器欲貿易
於北方既而不果行有從之轉售者既受直矣問將
何之其人曰欲效君前策耳叔卿曰不可吾聞北方
新有災饑此物必不時貫故不以行余豈宜不告以
誤子其人即取錢去居鄉介潔非所宜受一介不取

妻子困於饑寒而拊庇孤惻惟恐失其意起家進士

至著作佐郎熙寧中卒

宋史

曾鞏字子固游太學歐陽修見其文而奇之自是名聞天下舉進士調太平州司法叅軍召入編修史館書籍遷館閣校勘英宗實錄檢討通判越州歷知齊襄洪福明臺滄州進職直龍圖閣鞏為治尚威嚴其徙滄州也過闕神宗召見勞問遂留判三班院鞏上疏議經費神宗頗嘉納之手詔中書曰五朝史事宜付

曾鞏遂以為史館修撰試中書舍人遭母憂卒年六十五平生嗜書家藏至二萬餘卷手自讐對雖白首不倦又集古今篆刻為金石錄五百餘卷有文集曰元豐類藁五十卷外集十卷初與王安石友善安石稱其文辭以譬水之江漢星之斗神宗嘗問鞏卿與王安石最密安石何如人鞏曰安石文學行誼不減揚雄以吝故不及神宗遽曰安石輕富貴不吝也鞏曰臣謂吝者安石勇於有為而吝於改過耳神宗頷

之呂公著嘗告神宗以鞏為人行義不如政事政事不如文章鞏以此不大用云

東都事畧

按曾子固事績具見韓維所撰神道碑中史傳特錄其議經費一疏得毋以此為未竟其用乎據碑文所著尚有續元豐類藁四十卷史傳亦失載○

又按子固謚文定宋史及行狀墓志俱不載續文獻謚法考亦無之惟見於陳宗禮所撰曾文昭家傳及虞伯生曾氏祠堂記中但賜謚歲月無考

原

跋

鄧潤甫字溫伯建昌人皇祐進士為上饒尉武昌令熙
寧中以王安石薦直舍人院知制誥擢御史中丞遷
翰林學士因論奏相州獄為蔡確所陷落職知撫州
以龍圖閣直學士知成都召復學士一時制作獨倚
潤甫焉哲宗立惟潤甫在院一夕草制二十有二修
神宗實錄以母喪去終制以承旨召除禮部尚書紹
聖初首開紹述遂拜尚書左丞章惇議重謫呂大防

劉執潤甫不以為然曰俟見上當力爭無何暴卒謚

安惠

宋史

按鄧潤甫人物志不載林志諱其開紹述事今據
宋史

曾誼字子常南城人皇祐進士博聞強記明於大體善
屬文一時名出衆右為吏平恕質慤務在愛人不為
刻察提舉江南東路常平同職欲增賦役民誼爭之
不得自請罷去遂知楚州家故貧節廉自重罷吏歸

常隘門居不與人事

林志

許抗字損之南城人皇祐進士任沙縣時彭孫嘯聚亡命阻山為固抗挺身入壘說降之移知郴州鑿湖千餘頃民賴其利官至福建轉運使

同上

李山甫字明叟南城人皇祐進士通判河州羌人犯城山甫與知州鮮于師中固守凡二十七日而圍解元豐初王韶薦其才可用授作坊使權發遣澧州召對論邊務神宗勉慰久之既至蠻峒懾服山甫長於聽

決而原於人情臨事敏捷所至有聲累官樞密副使
同上

曾肇字子開舉進士調黃巖簿稍遷國史院編修官進
吏部郎中元祐初拜中書舍人實錄院修撰除給事
中固辭請外以寶文閣待制知潁州徙應天府入為
吏部侍郎論南郊既去皇地祇位而議者欲夏至遣
冢宰攝事則不復有親祭地祇之時於事天則躬行
事地則遣官非王者父天母地之義又議明堂配帝

請復設五帝與昊天上帝並祀徙刑部侍郎出知徐州紹聖初元祐士大夫皆流竄嶺表最後謫前史官范祖禹等以實錄譏訕為罪肇以嘗與修降集賢院修撰知滁州徽宗即位復為中書舍人會日食故事當降詔求直言徽宗命肇草詔詔下投匭者日千百人元祐士大夫再以赦恩甄敘或復舊職典方面肇奏生者蒙恩矣死者未被聖澤也請如寇準曹利用故事檢會臣僚貶死未經敘復者還其所奪官職遷

翰林學士兄布拜相以親嫌除龍圖閣學士提舉中
太一宮元祐士大夫再被降黜肇請與俱貶言者繼
之遂落職謫知和州貶濮州團練副使汀州安置移
台州卒年六十二東都事略

按南宋陳宗禮所撰曾文昭家傳歷事英神哲徽
四朝踐更十二州歷吏戶禮刑四部侍郎兩為中
書舍人封曲阜開國侯贈少師謚文昭所著有曲
阜集四十卷西掖集十二卷內則五十卷外則三

十卷史傳皆失載按王偁曰鞏與肇以文章被近
用為時儒宗學者仰之布雖相蓋可貶云

呂南公字次儒建昌南城人於文不肯綴緝陳言熙寧
中士方推崇馬融王肅之業剽掠補拆臨摹之藝大
行南公一試禮闈不偶退築室灌園不復以進取為
意益著書且借史筆以褒善貶惡遂以袞斧名所居
齋嘗謂士必不得已於言則文不可以不工蓋意有
餘而文不足則如吃人之辯訟心未始不虛理未始

不直然而或屈者無助於辭而已故毅然盡心思欲
與古人並元祐初立十科薦士中書舍人曾肇上疏
稱其讀書為文不事俗學安貧守道志希古人堪充
師表科一時廷臣亦多稱之欲命以官未及而卒遺
文曰灌園先生集傳於世

同上

王无咎字補之建昌南城人第進士為天台令棄而從
王安石學久之無以衣食其妻子復調南康主簿已
又棄去好書力學寒暑行役不暫釋所在學者歸之

王安石為政无咎至京師士大夫多從之遊然與人寡合常閉門治書安石薦其文行該備守道安貧詔以為國子直講命未下而卒

同上

朱軾字器之南豐人嘗從曾鞏學性寬和輕財急義悉以祖業讓弟軫獨取故居曰此先人廬不可失也鄉民熊禧饒華負官逋欲自盡軾傾囊濟之得不死

物志

傅野字亨南南城人任定海尉後徙居新城幼有志操

屹然慕古豪傑風王韶為建昌司理薦於郡守為軍
學教授韶受命取熙河奏為熙學教授韶還朝論事
即言野有文章學術而老願補東南一官上可之調
明州定海縣尉所為文章號通藁二十四卷鄧潤甫
為之序

林志

陳次公字仲父南城人安貧樂道隱居著書李觀嘗以
詩美之有之子出蒿萊行潔業且精之句觀臨終執
次公手以明堂圖制為託云

同上

朱京字世昌南豐人博學淹貫登進士甲科為太學錄
神宗召見論事擢御史風神峻整見者憚之目為真
御史初臺臣奏事必先移閣門得班乃入京嘗以名
聞翼旦會有先之者不及對而退帝問京安在詔召
之入為留班以須未幾以論大臣謫監興國鹽稅歷
江東轉運判官提點淮西刑獄元符初遷國子司業
宋史

朱彥軾字熙寧進士歷官刑部侍郎有小民曉出負販

晝歸賊刃其母而逃遺刃在旁隣伍執其子於官鍛鍊誣服獄已具彥疑其冤推辨得真賊而出其子除

中書舍人

林志

朱襄彥之弟為陳留尉縣直國門四方逃亡之數襄有方畧盜發必得一境肅清一日有中貴人館縣驛已而徵簿書若有所考按者襄曰畿邑刺舉監司職也朝廷未聞遣使此必詐也為圖奸利耳送獄鞫之果然仕至知韶州

同上

符行中南豐人父授元豐進士累官中奉大夫贈南豐
開國男行中政和進士為溫州通判知成都府所至
有政績任江西轉運使奏減月俸虛額五分識虞允
文於常僚中後以言奪職安置南雍州所著猥藁四
十卷

同上

童蒙字敏求南城人未第時居城北鄉外曰塔步家貧
聚小兒學以自給壯年偉貌鄰室處女素慕之一夕
排闥來奔童力拒之女不肯去曰苟不見容當死於

此童百方譬解終不及亂女嘆惋涕泣而退童不復居其地託故徙焉後登政和進士第官至承議郎知

蘄州

人物志

范柔中字元翼南城人舉進士官至宣德郎太學博士其學長於春秋著春秋見微十卷行於世折衷三傳去取諸家深得聖人之意元祐間上書言事後被禁錮遷謫死紹興初朝廷崇尚節義追贈直祕書閣得

官一子

同上

曾紆字公卷布子善詞翰有志節以蔭補官歷州縣坐忤時貶零陵與黃魯直厚善紹興二年除直顯謨閣守本郡別號空青有文集十卷山陰陸游為常平使者至臨川得其遺文嘆舉世士大夫知空青不盡云

林志

按曾紆林志說入撫州人物志所載事績與林志全不合白志入建昌

曾志

一作怙

字仲常鞏之孫補太學內舍生以父任郊社

齋郎累官司農丞通判温州須次於越金人陷越以
巴拜為帥約詰旦城中文武官並詣府有不至及藏
匿不覺察者皆死恚獨不往為鄰人糾察逮捕辭氣
不屈時金人帳中執兵者皆愕眙相視巴拜曰且令
出左右盡驅其家屬四十口同日殺之越南門外越
人作害瘞其屍金人去恚弟朝散郎思時知杭州餘
杭縣事製大棺斂其骨葬之天柱山

東都事畧

曾悟字蒙伯文昭孫宣和進士靖康間為亳州士曹金

人破憂悟被執嫚罵衆環刃刺之妻孥亦同日被害

林志

按曾悟林志亦載撫州人白志改正

李涓字浩然南豐人仕為鄂州崇陽令靖康之難募兵勤王至蔡州與金人戰死之同上

丘稅字為高南豐人補入太學時方宗王氏新經稅惟尚理義故不偶建炎間上書請都金陵以圖恢復嗜古好文憂時之心散見篇翰著有議古集寓文類詩

解義

同上

蔡延世字永叔南城人建炎中以文武全才舉為建昌兵馬監押金人猝至守倅皆遁延世櫻城固守遂領軍事嘗倅當塗及濠梁所至有聲

同上

吳伸南城人與弟倫俱太學生立社倉以周貧乏朱子記畧云紹興甲寅之歲發私穀四千斛以應詔旨民有所仰食無復死徙之虞咸德於吳而伸與倫不敢當曰是倉之立君師之教祖考之澤而鄉鄰之功也

曾造南豐人性和易而操持確不可移淳熙中知乳源
謂養士先於教於是籍官田及民廢業數百畝為學
產創黌宮立職長嚴課試士風翕然丕變尋調知樂
昌遷學於城東訓士亦如在乳源時於是樂昌文教
方軌中州矣

廣東名宦志

張大經字彥文南城人紹興進士宰龍泉儀真俱有善
政孝宗召拜御史嘗論中人不宜薦士以傷士風秋

早詔求言大經極言民力竭而愁嘆多軍士貧而怨嗟衆願踈出憮腐抑絕倖門除禮部尚書出知建寧府移鎮紹興辭不拜主眷未衰抗疏引去人方之孔

戣壽踰八十謚簡肅

白志

劉號瑞南城人紹興進士學問優贍政事老成為時所重官至刑部侍郎龍圖閣學士

林志

曾炎字南仲肇之曾孫隆興進士嘗親捕劇盜數十人貽書理官謂兵革甫定宜有縱舍犯者多得未減累

官通奉大夫封曲阜開國子

同上

游少游字希卿南豐人隆興進士攝永興令郡吏督賦語侵少游叱曰刺民之政吾不忍為命杖之又取宗室武斷者繩以法豪猾斂迹遷廬陵縣判南安軍官至朝列大夫

同上

何坦字少平廣昌人淳熙進士歷靖州江陵府教授知將樂縣擢知連州所至以善治聞累遷寶謨閣學士廣東提刑廉平為嶺南之冠卒謚文定所著西疇常

言見百川學海人物志

陳宗禮字立之南豐人少貧力學淳熙中舉進士累官
參知政事以直言清節著卒贈時江郡公謚文定

林

志

鄧約禮字文範南城人從象山學嘗為江州德化丞兩
攝邑葺理凋弊得民心李浩以子妻之遂家臨川由

進士官至常德府推官以子貴累贈中大夫

人物志

聶子述字善之南城人紹熙進士官至吏部侍郎以置

制使出帥西蜀已而致政歸適有盜殺郡守朝廷遣將欲屠城子述單騎至麾下力陳民寃乃止殺其渠魁卒謚文定追封衛國公

同上

曾漸字鴻甫南城人紹熙進士累官至工部侍郎立朝

有風節卒贈少師謚文莊

林志

何行字自強廣昌人父聖能官至紹興知府多善政行其長子博通經史善屬文以明經舉知武平縣地接贛廣多劇盜行因舊城築之民賴以安丁父憂服除

見宋境日蹙無復仕進意以文籍自娛有文集藏於

家
人物志

饒廷直字朝弼南城人由進士官鄧州通判攝州事值
宋金講和割唐鄧二州屬金迫而取之以未得命
堅守以待勢日危急廷直以手染血印表上遂自刎
嘗作鑑論百篇包恢序而刻之

同上

包恢字宏父建昌人自世父約叔父遜從朱熹陸九淵
學恢少為諸父門人講大學其言高明諸父驚焉嘉

定進士邵武守王遂辟為光澤主簿平寇亂建寧守
袁甫薦為府學教授監虎翼軍募土豪討唐石之寇
改沿海制置司幹官會歲饑盜起金壇溧陽之間恢
部諸將誅夷之改知永豐縣添差通判台州徐鹿卿
討溫寇辟魚提點刑獄司主管文字改通判臨安府
遷知台州有妖僧居山中號活佛男女爭事之因為
姦利豪貴風靡恢誅其僧移知建寧尋知隆興府魚
江西轉運沈妖妓於水化為狐人皆神之有母慙子

者年月後狀作疏字恢疑之呼其子至泣不言及得其情母孀居與僧通惡其子諫以不孝坐之狀則僧為之也因責子侍養跣步不離僧無由至母乃託夫諱日入寺作佛事以籠盛衣帛因納僧於內以歸恢知之使人要之置籠公庫逾旬吏報籠中臭達於外恢命沈於江景定初權禮部侍郎尋為中書舍人林希逸奏恢守法奉公其心如水知平江府召為刑部尚書僉書樞密院事封南城縣侯郊祀禮成以資政

殿學士致仕年八十有七臨終舉盧懷慎臥簣窮約
事戒諸子斂以深衣作書別親戚而後卒有光隕其
地贈少保謚文肅

宋史

李彖字材叔南城人躬行孝弟居山中于諸經無所不
說而尤用意於詩易著詩孟子講義易統論

林志

曾穎茂字仲實漸之子官至吏部侍郎理家莅政慎密
嚴重凡臺閣典故官曹科條邦計本末洞究綱紀繩
引珠貫密施顯設刃游縷解有所操執不回不撓封

武城侯

同上

黃晟字子成南豐人明經考古得諸儒言以沈涵細訂
陸象山稱之曰粹然其容懇然其中其施不潰其守
不渝推父蔭以與兩弟惟季弟無可及則推己田與
之結廬仙巖之旁扁曰壺隱

府志

童宗說字夢弼南城人為袁州教授有柳文音註行於

世極其審博稱善本

林志

陳堯舉字綱伯南豐人舉進士嘗承江西運司檄考試

廬陵士子拔文天祥人謂其知人居官甘淡泊無一

毫妄取學者尊為鳳岡先生官至通判臨江軍

同上

諶祐字自求南豐人古貌古心耿介寡諧蕭然萬山中

窮經博古文宗左氏班馬詩宗杜黃每一篇出江湖

傳誦而律體更精

同上

劉揆字信翁南豐人侍郎張淵微薦為國史院校勘時

七十餘矣既入館分校列傳未上而卒

同上

黃載字伯厚南豐人世習儒明左氏春秋貫穿百家晚

年用平寇功補官鄭丞相清之力引之知封州以廉

謹稱

同上

黃樞字機先南豐人慶元進士為南雄司法峒寇猖獗
郡檄樞督餉且調度破之賊率衆數萬空巢而出官
軍不滿千遂死之初樞問途著隻鞭語其下曰以此
為識已而賊退求尸得鞭以證事聞贈通直郎

同上

李萬字必大南豐人嘉定進士嘗典某郡獄兵變將盡
縱囚萬冠裳坐廳事置公牘於前曰吾受命主獄囚

者得罪於國法奴輩安得縱舍既而郡倖與萬同出撫定亂得息秩滿調贛縣丞有兵事萬堅執不阿事

平上官壯之

同上

趙崇侯字信之南豐人嘉定進士為福建運司主管文字臺有疑獄崇侯得其情未幾權南劍州事以清介

名

同上

鄧均一名垌建昌人嘉定進士政事寬平所至以鄧佛

稱之歷官吏部侍郎卒謚清惠

同上

趙崇嶠字漢宗南豐人嘉定進士為石城令時寇賊橫
虐崇嶠以恩信結將士討除元惡改知淳安縣上疏
極論儲嗣未定及中人專橫官至朝散大夫有白雲

崇

同上

謝升孫南城人舉進士官翰林編修以文章名世人稱
南窗先生有詩義法行世

同上

孫瑞字履祥南豐人端平進士有學行事母以孝稱受
學於真西山深明義理歷任肇慶司理翁源令為政

清簡民便安之

同上

張淵徽新城人登淳祐進士第一人累官侍郎以直節

著人物志

曾淵字廣徽南豐人淳祐進士國事急賈似道得罪陳
宜中當國淵遁歸里被劾竄雷州景炎起參知政事

走南安而卒

林志

趙與植字德茂南豐人淳祐進士幼敏悟工文章嘗知
醴陵縣嚴州兵變往為知州單車入境平亂擢知臨

安府 同上

蕭雷龍字顯辰建昌新城人景定進士調臨安府學教
授通判衢州權知府事北兵薄城下不降脫還建昌
與同里人黃巡檢起兵時元兵四合雷龍度不可支
與黃巡檢及麾下數人奔入閩未出境為同安武人
徐浚沖獲送縣權縣尹劉聖仲素與雷龍有怨殺之
後聖仲北來泊舟小孤山有巨艦衝前建大旗書曰
蕭知府兵繼見雷龍坐船上聖仲大呼有頃不見以

驚死 宋史

吳楚材名炎以字行南城人德祐元年建昌降明年春
楚材還鄉糾集民兵既失利且乏援元兵誘降其衆
多解去楚材走光澤為人所執及其子應登以獻郡
遣錄事婁南良訊之曰汝何錯舉楚材抗聲曰不錯
不錯如府錄所為乃大錯耳吾一鄙儒特為忠義所
激為國出力事雖不成正不錯也南良愧而語塞吳
浚為江西制置招討使斬楚材父子傳首諸邑益王

立於福州聞而哀之贈官朝奉郎即邵武境上立廟

賜名忠勇

林志

何洲聖能次子志行醇篤文章高古以捧西疇遺表恩授副尉政寬守潔恬於進取樞密陳文定少與洲善且連姻好及文定貴顯浮沈小邑未一往干宋未退休御史程鉅夫求賢江南勸洲再仕以疾力辭

人物志

傅夢泉字子淵南城人乾道進士嘗遊陸象山朱晦菴

張南軒之門朱子稱其氣質剛毅極不易得象山讀
與周益公論道書曰子淵擒龍打鳳手又曰義利之
辨子淵之對可謂切要二賢所許如此嘗講學於鄉
席嘗滿朱子謂子淵得朋進業之盛深慰鄙懷為澧
州衡州博士立石鼓書院寧寧都歷清江通守皆以
善政聞著有石鼓文集

縣志

瞿元肅南豐人四世同居百五十餘口父母均慈子孫
盡孝兄弟友愛婦女勤事父歿兄弟六人廬墓盡哀

有司聞於朝旌表召元肅入見賜御書復其家林志
謝元禮南城人通五經尤長於易以德行文學稱元程

鉅夫志其墓

同上

黃叔美字河清南城人隱居盱南山中為詩慷慨磊落
不凝滯於物有集揭傒斯序之兄叔敬亦以文學知
名

同上

黃繼善字成性南城人著史學提要以四言韻語編貫
諸史始上古終宋條理井井寧都魏禧自廣陵攜入

江西見者驚嘆以為秘本舊有程元海序今不傳

魏

叔子集

按繼善舊志府縣志皆不載其家世行事無可考
魏禧曰盱人之書亡於江西傳於廣陵數百年後
卒以江西人得之信乎書之傳有數也

廖應淮字學海南城人自號溟津生抱負奇氣年三十
遊杭上疏言丁大全亂政狀中以法配漢陽軍應淮
荷校行歌出都見者壯之遇蜀人杜可久為禱營將

脫其戎籍授以邵子先天易數其算由先天起數應
淮神警一問輒了嘗坐臨安樓市大衍卜卜已輒閉
樓危坐取一環按劍自鍛之當火少休則危坐以為
常曾過曾淵子家索酒飲酣抵掌放歌見賈似道直
言宋鼎將移語畢亦徑出國子監簿吳浚以先天易
箋陰符經六花陳法欲上之應淮擲其藁於地曰誤
天下國家者此書也浚欲從之受易罵曰若黃口兒
語此人皆邵子矣後以其數學授進士彭復之以傳

鄱陽傅立著有元元集歷髓星野指南象滋說會補
畫前妙旨約十萬言 宋史

按應淮雖號精數學而氣節奇偉前志人物傳不
詳而重入方伎今采宋史補此而削彼

張日中南城人景炎六年文天祥帥師次汀州日中以
兵來會天祥師潰於空坑日中奮力拒戰身被數十
槍而死 林志

傅汝舟字曉窗南城人博學工詩欲紹先世令名乃立

義試詩會聘鄧秀實師之日與四方名士更相倡和
一時作者雲集

同上

聶銖字積道

關

人隱居不求聞達或勸其出答曰吾

讀祖父之書樂堯舜之道平生志願足矣鉅公聞人
多就見焉

同上

李淞字宗海觀之後南城人登進士不仕元初臺臣舉
故官淞與謝枋得固辭不就時稱其忠隱於龍馬峰
捐金購書研精考訂以續先代之緒

人物志

按李淵林志八元

元

程文海字鉅夫避武宗御名以字行建昌路南城縣人
德祐元年從叔父西渠官於洪講學東湖之上元至
元十三年充質子挈家入覲賜見面試文字署翰林
院除應奉文字改修撰陞集賢院直學士領會同館
事擢侍御史行御史臺事南人入臺自鉅夫始時上
思治求賢如渴命鉅夫前往江南諸道訪求賢俊於

是萬一鶚余恁趙孟頫等用焉時僧格專權鉅夫發
其奸除江南湖北道肅政廉訪使滿秩還家上思用
舊臣召除翰林學士知制誥同修國史商議中書省
事與修成宗實錄有旨命往湖廣定選訖事以病假
歸武宗賓天上居諒闇首召老臣十六人造朝鉅夫
與焉特加榮祿大夫仍故職賜世德之碑延祐三年
得告南還命廷臣祖餞以榮之薨年七十所著文集
五十卷

何太虛集

按程鉅夫傳元史太長林志人物志太畧白志從
太虛所撰行狀節錄鉅夫封楚國公謚文憲行狀
失載

鄧茂生字秀實南城人明經博史以至諸子百家之書
陰陽術數之學無不研精至理學者宗之一時記述
金石之文多出於其手人稱秀實先生

林志

劉堯字起潛南豐人薦本州儒學教授性聰敏好讀書
博覽古今宋末與同里譔祐自求以詩文鳴年三十

七而宋亡又十八年當路薦署郡學正年七十受朝
命教授延平卒年七十八所著有經說講義水雲村
藁英華錄隱居通議凡百二十五卷

人物志

按林志壘字子長所著尚有水村補史詩

劉麟瑞號如村壘子至治中追維宋末仗義死事之士
討據遺逸賦五十律題曰昭忠詠邑人趙景良合水
村十忠詩為一卷附以汪水雲方虛谷等傷時之什
總名之曰忠義集

元詩小序

胡夢魁字景明建昌新城人未冠以明經貢於鄉登進士第累遷浙江制置司參議官元初奉母歸里江西宣慰使檄攝本郡判官者二年以薦擢僉廣西憲事嶺海吏治不律所至蕩滌之居四年民為建祠以病歸所為詩文曰偶然集

程雪樓集

揭祐民廣昌人泰定中官邵武經歷三至京師公卿多樂與游程鉅夫尤敬禮焉寓居盱水上自號盱里子族子侯斯為作傳稱其騰擲宇宙凌轢古今有盱里

子集 揭文安集

按林志所載與此全不同

江學庭南城人才優學博後進仰之若山岳仕至國子

祭酒贈莒國公謚文正

林志

吳德新字止善建昌人工醫留京師久之嘗往寧夏會
盜至德新見執脅使降誓不從賊乃縛其兩手加白
刃頸上迫其畏屈德新罵不已乃曳之井上陽欲擠
之德新偶得寬即自投井中仰罵賊賊射矢貫其頂

罵益力賊怒以長槍刺之然亦壯其志曰此真丈夫
也以土埋井而去

元史

余冕字服周南城人由吏負官至柳州衛經歷懷遠久
為徭賊所殘冕與知縣馬希武撫安徭民督工築城
奸民以為不利勾徭復叛有先來言者冕曰為國捐
軀奚恤一死徭數千攻圍刃職官六人冕同希武奮
不顧命與賊對敵遍身中矢猶罵賊不屈竟被碎屍

人物志

夏顯卿臨川人避地南城以材力為王溥所知時各路
軍州洶洶不知所屬顯卿勸溥當受福建平章楊珠
布哈調度為溥糾練義旅示以順逆賊至輒擒滅境
內以安溥承制署顯卿總管府參謀至正戊戌陳友
諒兵圍建昌顯卿率衆入城與陳兵三接戰殺傷相
當後城守日急謀走閩求援溥未決陳將誘溥持友
諒偽平章敕命授之仍授參謀顯卿乃對衆聲義諫
阻溥怒遂殺之

同上

戴良南城人順帝時臨川賊鄧忠陷建昌路良起義兵

復之林志

劉時習字說道南城人負德器為文章如菽粟布帛皆有資於民用知施容州時郡國多故時習宣之以能推之以忠所施各適其宜致仕歸鄉卒

同上

朱倬字孟章新城人登至正壬午第知遂安縣尹壬辰秋寇由開化趨遂安吏卒逃散倬坐公所以待盡寇焚解舍乃赴水死

新安文獻志

按朱倬志書俱不載今采明初歙人汪仲魯獻所
撰朱孟章哀辭補入又考焦氏經籍志倬所著有
詩疑問六卷刻綠水亭經解中未附南昌趙惠詩
辨說一卷

原跋

萬清字仕廉南城人由進士官至樞密院使至正辛丑
四海不寧棄仕還家仍命鎮守建昌路總管府洪武
初竄入閩地屢徵不就使人求得之貶和州知州不
就卒

人物志

黃覺經建昌南城人五歲因亂失母稍長誓天事佛發願求母所在乃渡江涉淮行乞而往衝風冒雨三十八年備歷艱苦至汝州梁縣得其母以歸有司請旌

其門閭

元史

翁漢傑新城人年三十方讀書四十成大儒明詩經閉戶却客吟詠自適後徵為富州學正

林志

涂建可新城人與席梅可潘東臯李南浦為黎川四友

至正末杜門避世開畦種菊自號菊隱

同上

揭繼可字汝善廣昌人學問以體用為大本以踐履為實功子弟有過每涕泣而道之

同上

彭仕淵新城人仗義有為至正間紅巾陷邑仕淵與姪仲斌集義兵為保障民賴以安

同上

李宗可廣昌人有勇略善禦余闕為淮南行省左丞延至幕以兄女妻之擢池州判官權義兵萬戶統新軍守水砦屢有戰功賊既破城宗可橫槊入賊中殺死甚衆聞闕死馳還家聚妻孥謂曰元帥死國吾義不

屈汝等毋不死為人所辱拔劍無小大盡殺之出據
胡床坐飲數巨觥自刎葬余闕墓側

宋學士余左丞

傳後

按潛溪載宗可為斬人實籍廣昌其子孫見為廣

昌人特改正

江西通志卷八十三

欽定四庫全書

史部

江西通志卷八十五

詳校官監察御史_臣范衷

檢討_臣德生覆勘

總校官知縣_臣楊懋珩

校對官編修_臣沈清藻

謄錄監生_臣王永鎮

欽定四庫全書

江西通志卷八十四

人物廿九

建昌府二

明

吳毅字尚志南城人性敏學膽學者稱學海先生洪武
初徵拜博士與修大明律令致仕歸教授鄉里為文
古雅不事雕琢有學海集

林志

朱大中新城人博學能文杜門不出專務聖賢之學洪武初為國子助教侍講多所裨益後致仕歸仍給俸

尋復徵聘而大中已歿賜祭葬官其子

安志

程新字文炳新城人洪武中鄉舉知雙流縣清慎練達興禮讓革奸弊勸農桑毀淫祠政化大行累官兵部

侍郎

同上

魏卓廣昌人洪武進士官監察御史巡按河南畿輔內戚某橫甚立置之法質明詣闕陳狀上賜之酒曰御

酒同卿飲鋒刀不肯饒意卓乞哀也卓應聲云寧為忠諫死不怕帝心焦忤旨命金吾引出戮之已而上

深悔賜葬復官

縣志

江仲海字會龍新城人洪武初以宋濂詹同等薦聘至京試天馬賦授禮部主事歷官侍郎為文雅有古致所著有光岳鍾靈集夢筆山房文類

安志

翁顯德新城人徐壽輝陷江右乃召募鄉兵屢與賊戰敗走之洪武二年任廣東右衛山寇房文廣為亂顯

以前鋒力戰死詔贈官蔭子儀

同上

黃肅字子邕新城人元季官禮部主事洪武中入朝陞
侍郎晉工部尚書有醉夢集王子充云子邕詩簡高
平質一本漢魏絕去近代聲律之習

明詩綜小序

徐諒字子直南城人洪武初本學訓導貧而好學為詩
宗杜少陵諸生翕從以其為徐孺子後稱曰南州先
生

林志

張士達南城人博學善記長於文章洪武初赴闕上萬

言書出使西域其為文氣骨雄偉見者奇之

人物志

何澄字源清新城人洪武中鄉舉領教職佐縣政咸有

成績擢禮科給事中直弘文館引年致仕

林志

王增字仲益洪武末官御史剛毅亮直嘗居母憂鄰火將及增具斬服望拜欲赴火死須臾反風母柩獲全

同上

劉紹字子憲以字行新城人洪武中官翰林應奉文字

與盱江湖布張達同時有詩名郡人張烈光啓編其

詩入元音遺響

明詩綜小序

盧秉安字文定南豐人洪武間知東莞歲侵緩催科曰
上官罪後期吾自當之不忍迫吾民也有訟於庭者
諭以理咸自悔圉圉常空居十九年調東阿士民流
涕廣東名宦志

李誠字子高南城人洪武初搜求賢俊有司以誠貢於
京銓衡試以經義詩論咸置第一授中江縣丞招集
流散降服野人後官河南益以廉勤為政增戶一千
六百有奇開荒田三百餘頃建三賢祠修復鳴皋洛

西書院

林志

李紘字梯雲南豐人建文中進士官翰林院編修居家

孝友為人端謹所著有仕優榮

同上

何文淵字巨川廣昌人永樂進士授御史歷按山東四

川烏蒙奸民什伽私其土知府祿昭妻懼誅告昭謀

逆詔發軍討文淵檄止所調軍而白其誣宣德五年

用顧佐薦知溫州居六年以胡濙薦擢刑部右侍郎

朝議征麓川文淵疏諫帝下其議僉謂宜討于是西

南騷動僅乃克之而失亡多其冬乞歸景帝即位起
吏部侍郎尋進尚書以銓選為御史所劾致仕所著

有東園集

列卿錄

江文海字會龍南城人廣學多覽著博約考一書自歷
代制度古今治政人物賢否靡不具載官至禮部侍

郎

白志

揭稽廣昌人永樂進士居臺官正色立朝介然有守出
外治廉恕忠勤赫然有聲海南天妃廟靈應使者過

必察焉稽當考察時渡此惟投一詩有若載苞苴并
土物任教沉在此滄溟之句仕至兵部侍郎

分省人

物考

李永年南城人永樂進士為庶吉士遷吏部員外才能

茂著歷山東叅政在官四十餘年偉績在人耳目

林志

鄭誠字文實南城人永樂中以國子生擢吏部司務歷

文選郎中宣德初超拜本部侍郎卒楊東里作墓志

同上

程輅字伯衡新城人精於書禮尤長篆隸溫柔篤厚言

動不苟以古道自居自號東臯處士

人物志

饒昞南城人由監生營建北京練歷幹濟事多克集命

署大司馬事得大臣體遷廣西叅議自始至終以廉

慎持已卒之夕衣衾僅足為紼

同上

丁琳字文善南城人由監生官至福建僉事黜奸貪疏
寃抑恩威並著羣吏鼠伏平生耿介卒之日囊無十

金之積

同上

趙禮南豐人永樂進士嘗校兩浙士極稱姚夔既而夔
魁南省旋魁天下其明于知人若此歷官提學副使

明一統志

程南雲南城人永樂中以能書徵與修大典授中書舍

人尤精篆隸累官太常卿

林志

甘霖字時雨南豐人永樂進士為御史執法不阿與李

立齊名

同上

李立南豐人永樂進士為御史發奸擿伏風紀肅然上

目為小李而不名仕終副使

同上

賴翼字遜志廣昌人永樂進士為監察御史廉正有威
官吏敬憚嘗出使廣東占城使臣私相語曰此御史
嚴肅威斷而不可犯累官按察使

明一統志

賴瑛字世傑廣昌人永樂進士為監察御史剛明直亮
遇事敢言激揚善惡允愜輿情憲度肅清獄無冤滯
累官至叅政

同上

張文質字中南南城人寒素時嘗於郭東旅肆獲一囊

頗重意人遺金守候抵暮竟無人至歸而啟視果白金五百兩翼日仍至故處候之有老叟逐一少年散髮血額倉皇入肆詰之則遺金者之父疑子妄費欲簪死質驗金數相符悉還之其父子欲中分質曰吾利苟得則不於此候爾矣子昇成化己丑狀元

人物

志

饒禮字景節南城人永樂中以國子生授御史累陞河南布政使為政寬恕所至咸愛戴之

林志

鄧榮字孟擴南城人永樂進士擢御史巡按蘇松遷陝西按察使進副都御史正統中扈從北征土木之變

遇害贈都御史

同上

俞泰南城人正統中由監生為御史激濁揚清有聲於時風紀肅然豪猾不敢肆處已待人斷獄應事皆敬

慎詳密官至廣西僉事

明一統志

饒秉鑑字憲章廣昌舉人祖文遠徵才猷不就父希明充糧長至京太祖召對稱旨賜銀五十兩居父喪事

悉遵家禮秉鑑初貳肇慶聽訟理財皆公正廉明擢
守廉州時盜賊為梗秉鑑前後擒獲三千有奇廉民
安堵都御史葉盛旌為十郡之最事聞憲廟賜綵緞
銀幣甚厚益感激疏諸大將玩盜剝民罪中忌罷歸

著有春秋提要

林林志粵志

何喬新字廷秀廣昌人景泰進士由南京禮部主事歷
陞福建副使清流歸化里恃險不供賦白於都御史
置歸化縣民始奉要東遷河南按察使進湖廣右布

政使擢右副都御史巡撫山西召拜刑部右侍郎孝
宗嗣位萬安劉吉等忌喬新剛正出為南京刑部尚
書用王恕薦始召還御史鄒魯誣喬新受賄乃拜疏
乞歸博綜羣籍聞異書輒借鈔積三萬餘帙皆手校
讎尤篤好濂洛之學與人寡合氣節友彭韶學問友
邱濬而已中外多論薦竟不復起家居十五年卒賜
諡文肅所著有宋元史臆見周禮集注策府羣玉續
編勲賢琬琰集及椒邱集五世孫濤與弟沆同舉嘉

靖己酉鄉試濤第一授安慶府推官到官三日吏白
當伏謁監司濤顰蹙曰非我所能即棄官去源另有

傳
列卿錄

左贊字時相南城人天順進士歷任吏部郎中豪邁不
羈至其為文謹繩尺崇理致讀之溫然可愛尤精於
隸書為憲宗所稱初學於姚文敏又受知於李文達
二公秉鈞人謂且大用然贊內和外剛議論是非不
肯少假借以是為當道所忌官布政使而卒

林志

張昇字啟昭南城人成化己丑進士第一歷諭德遷庶
子大學士劉吉當國昇因天變疏言陛下即位言者
率以萬安劉吉尹直為言安直被斥吉獨存乃傾身
阿佞取悅言官昏暮款門祈免糾劾許以超遷由是
諫官緘口奸計始遂貴戚萬喜依憑宮壺凶醜熾張
吉與締姻及喜下獄猶為營捄父存則異居各爨父
沒則奪情起官且歷數其納賄縱子等十罪吉憤甚
風科道劾昇誣詆調南京工部員外郎吉罷復故官

歷禮部左右侍郎代傅瀚為尚書孝宗崩西番灌頂
大國師以被除率其徒入乾清宮昇請寘之法詔奪
國師名號斥逐之昇在部五年遇災異輒進直言亦
數為言者所攻正德初忤劉瑾謝病詔加太子太保

乘傳歸

列卿錄

按張昇所著有柏崖文集十四卷詩集二十二卷
和唐詩十卷卒贈太子太傅諡文僖

夏雲字時望南城人官教諭操履準古嘗膺聘為考校

官有士懷千金鬻舉者暮夜抵舍閉門拒之又有以當道故人書至者竟不啟視然終身不發人姓名亦

未嘗對人言也

人物志

黎崇字好禮南城人居父喪哀毀踰禮及葬結廬墓側三年不櫛沐免喪猶縞衣糲食與同邑潘烈新城余

永壽皆以孝行重於鄉國

林志

江澂字景吳南城人成化進士歷知縣建平寧海三縣所至廉靜有聲能以三代井田經界為重奏行親為

履畝定賦湮圯者悉罷其征且致麥秀兩岐之瑞陞
松江同知改淮安擢四川僉事清理屯田鹽法公私
皆便三年乞致仕

明一統志

夏泉字時清南城人成化鄉舉任蘇州通判平海寇有
功著有平海錄嘗奔宜陽扶兄柩歸次泗山舟漏漂
沒且盡泉慟哭柩回流不去呼他舟舉之

林志

何垕字朝舉新城人由進士為行人司使遼府惠王再
朞欲舉祭於墓垕毅然正之以禮改主事督覽真州

率民掩所暴骸疏商舟之滯壅有古琴逆瑾欲得之不與出知程番平生義利甚嚴兄仲同居疏食敝廬晏如也官三十年而家貧所著有易經諸解

人物志

吳駒字彥驤南豐人天性孝友讀書通大義工詩文侍親左右飲膳必躬親之昏定然後復寢父潮宗以茂才授政和令改海陽歸里人孫住給力其家里胥彭文杰誘而縛之潮宗覺率諸子拒之門毆文杰致死法坐潮宗駒曰吾父老矣吾弟幼且無後自詣理曰

死文杰者彥驤也令難之駒曰以子代父何不可乎
況殺人者實彥驤也非吾父與弟也令憫而代之孝
子日侍父獄中朝夕起居猶荷校而立父既出獄居
二載會有詔獄疑獄駒在行中至淮安病卒年且六
十一歲矣

羅一峰集

羅玘字景鳴南城人博學好古文務為奇奧年四十困
諸生輸粟入國學邱濬為祭酒試以文大驚成化末
領京闈鄉試第一明年舉進士選庶吉士授編修益

肆力古文尤尚節義臺諫救劉遜盡下獄玘言當優容以全國體中官李廣死遺一籍具識大臣賄交者帝怒命言官指名劾奏玘上言曰大臣表正百僚今若此固宜寘重典然言官未見籍記憑臆而論安辨玉石一經攻摘且玷終身臣請降勅密諭使引疾退或斥以他事庶不為朝廷羞而仕路亦清其後以天變黜大臣竟如玘言秩滿進侍讀正德初遷南京太常少卿劉瑾亂政李東陽依違其間玘東陽所舉士

也胎書責以大義且請削門生之籍尋進本寺卿擢
南京吏部右侍郎遇事嚴謹僚屬畏憚考績赴都遂
引疾致仕歸寧王宸濠慕其名遣使餽玘避之深山
及叛玘已病馳書守臣約討賊事未舉而卒嘉靖初
贈禮部尚書諡文肅學者稱圭峰先生

列卿錄

按羅玘所著有類說及圭峰奏議圭峰文集

廖永綏廣昌人性友愛五世同堂婦人入門無敢言分
費者衣製無專有隨便長短服之羅一峰高其誼言

於有司旌其門曰雍睦

林志

夏良勝字於中南城人正德二年舉鄉試第一明年成
進士授刑部主事調吏部進考功員外郎有詔南巡
即具疏與禮部萬潮太常博士陳九川連署以進極
言禍患且至時舒芬黃輦疏已前入明日吏部郎中
張衍瑞等十四人刑部郎中陸俸等五十三人繼之
又明日禮部郎中姜龍等十六人兵部郎中孫鳳等
十六人又繼之而醫士徐鏊亦以其術諫諸疏既入

帝及諸倖臣皆大怒遂下良勝潮九川鞏震鰲詔獄
芬及衍瑞等百有七人跪午門外五日加梏梏焉當
是時諸臣晨入暮出纍纍若罪囚道旁觀者無不歎
息泣下而廷臣自內閣及尚書石玠外莫有言者芬
等百有七人跪既畢杖各三十謫居首者於外餘奪
俸半歲再踰旬杖良勝等六人及余廷瓚周叙林大
輅各五十餘震鞏良勝潮九川除名他貶黜有差鰲
戍邊而車駕亦不復出矣良勝既歸講授生徒世宗

立召復故官大禮議起數偕寮長力爭及席書張璉
桂萼方獻夫用中旨超擢又連章執不可由是為議
禮者所切齒以久次遷南京太常少卿未赴外轉謫
茶陵知州明倫大典成詔責前郎中良勝脅持庶官
釀禍特深黜為民謫戍遼東三萬衛踰五年卒於戍
所穆宗立贈太常卿

白志

鄧汝相字仲弼南豐人嘉靖舉人授祁陽知縣多善政
報最陞雲南賓川知州未幾謝病歸居家二十餘年

年八十著有南溪集

府志

程熈字文純南城人由舉人尹鹽城上元嘗三入覲乘
一馬以一馬負冊書以一隸馭而已擢守鎮遠結四
十年未決之案以還侵地請三十年未支之糧以蘇
貧軍所去必有遺頌歷任四十年貧約僅同寒士官
至陝西苑馬少卿

人物志

李柱南豐人自邑城徙居紫雲橋積書數千卷以教子
弟鄉人稱質村先生以子萬實貴贈按察司僉事

楊

載鳴集

李萬實字少虛南豐人嘉靖進士授行人司擢刑科給事中疏論權璫改南垣為廣東僉事移浙江憲使乞歸家居二十餘年講明良知之學所著有崇質堂集二十卷王敬所序其奏疏名恬仕錄徐龍川序

人物志

李泰號塞齋新城人由進士仕至員外郎精於易學雖燕居動止不苟何蘭臯陳蘭坡皆所陶鎔者也主事時督通倉官車負逋連繫死者什五泰會同所司疏

其繫居呂梁砌堤岸千百丈時宦倖李廣督宮役同
官屈膝泰獨長揖里居周卹貧乏有范文正之風

白志

按李泰前志誤入宋今改正

羅鈇字明衡號愚邱南城人南京工部營繕所所正父
增被族人經獄連逮繫獄成鈇七上書以非例格不
行再詣闕泣不絕聲御史大夫汪鉉憫之為代奏廼
出增計事始終凡三十六年備嘗艱苦同邑楊諫亦

以孝著

安志

黃璉廣昌人為賀縣令舊例慶賀皆千戶行禮璉改縣行之造儀仗開三乘寺為習儀所建縣坊及江東津亭成梁除道九年多惠政後坐事謫民咸惜之

廣西

名宦志

王祿新城舉人知平和時縣新設祿建學校置學田設壇壝義塚修舖舍養濟院庶事畢舉以議大禮及請立皇儲忤時議歸子材進士歷官南司業

福建名宦

志

何源廣昌人嘉靖進士令嘉興愛民如子時有郭杰之
獄誣服者十年源覆按廉知殺人者郭明也釋杰而
罪明一邑稱神君值水災申請緩徵銀六千兩米三
千餘石查五年銀米之餘者補之官至刑部侍郎以

清節著

浙江名宦志

陶秀南城人嘉靖舉人為太平令先是里役不均田多
脫漏秀編造黃籍為十甲均田之法賦役悉清瀕海
故多軍衛庄田弗屬編管秀立為軍圖令復役一視

齊民又塾甃道路起皇華息肩二亭治義塚民甚德之同上

蕭原吉字文振南城人由鄉舉初授教職以薦召入即上章論劾權貴當路忌而軋之遂歸後尚書李時復薦之辭不就

人物志

王華字廷光南城人進士歷浙西寧紹諸郡鋤梗扶弱興學育材井井有序相傳華沒之所廳事前有樟樹大可數十圍一夕夢有童生來謁指與同往華叱之

而覺明日樹忽蹶聲震城市力疾出視遂卒

府志

陳本字子深南城人由舉人官至御史以忤魏瑞歸直聲聞於天下起雲南按察使僉事聞母訃歸以不勝喪卒子允衡別有傳

人物志

劉文卿字侯如廣昌人解元進士初為金華司理居常澣衣糲食簡嘖笑居郡齋朗誦一編不休擢吏部主事所推薦多剛直恬澹之士時新建相有所托持不聽尋改刑部自丐調南兵部以歸未幾卒年三十三

朱劉曰寧所撰直洲墓志

卷八十四

按劉文卿所著直洲集十卷而墓志云有白石遺編行世今不傳

張恩字元錫尚書昇長子由進士以兵部郎課最擢廣東叅政分守嶺東時患有巨惡民苦之號十虎三彪恩悉處以法官至浙江左布政使

人物志

鄧澄字來沙新城人篤行孝友淹博古今由進士改庶吉士出補監察御史風采凜然歸家數十餘年惟閉

戶讀書著有大隱堂集德隅集年九十餘終

同上

鄭嶸字天廷南城人由鄉舉任高州節推擢清虛糧賦役悉平拓城建學作新士類尋遷眉州知州即告休

崇質堂集

吳衍字子繁南城人由進士通判常州時海倭猖沸判主兵餉餽給不乏累遷刑部郎值讞嚴世蕃藍左道行獄疑言塞耳人以後患為慮衍獨以身任其責獄上得俞讞囚山右有邊帥以失機論死援大璫為言

衍曰國法也敢假以媚人哉乞歸歷十餘年卒

人物志

王材字子難新城人嘉靖進士由檢討陞南司業作太學志又取同邑儒先詩文類編黎川文緒人係小傳

附論斷於後

府志

羅汝芳字維德南城人嘉靖進士除太湖知縣召諸生論學公事多決於講座遷刑部主事歷寧國知府民兄弟爭產訟汝芳對之泣民亦泣訟乃已初開元會罪囚亦令聽講父艱服闋起補東昌移雲南副使進

叅政坐事為言官論罷初汝芳從永新顏鈞講學後鈞繫南京獄當死汝芳供養獄中鬻產救之得減戍汝芳既罷官鈞亦赦歸汝芳事之食飲必躬進人以為難鈞詭狃狂其學歸釋氏故汝芳之學亦近釋居官率以學為政而禪客羽流雜進親故求請輒應被汙名不辭年七十四端坐而逝

白志

按羅汝芳號近溪其學本於顏山農鈞與王龍溪並主講席龍溪筆勝舌近溪舌勝筆一時稱二溪

鄧元錫字汝極南城人遊邑人羅汝芳門嘉靖三十四年舉於鄉復從鄒守益劉邦采劉陽諸宿儒論學不復會試杜門著述踰三十年五經皆有成書學者稱潛谷先生范涑為南昌知府入覲薦元錫及劉元卿章潢於朝南京祭酒趙用賢請徵聘如吳與弼陳獻章故事得旨有司起送部試元錫固辭御史王道顯巡按秦大夔復以元錫元卿並薦且請無拘部試詔以翰林待詔徵之有司敦遣上道甫離家而卒鄉人

私謚文統元錫之學淵源王守仁不盡宗其說生平博極羣書而要歸於六經所著有五經繹三禮繹函史上下編皇明書潛谷雜著及潛學稿

同上

李經綸字大經號寅清子南豐人夙負醇德持躬斷斷以世教為己任為諸生隱而著書崇禎中學使侯峒曾序其書謂列之諸子無其真而頗有其辨視唐宋立言家無其備而悉補其遺卓然近代一儒兼何叔邱羅明德鄧潛谷之長遂擢祀鄉賢所著有大學稽

中傳禮經類編詩經教考聖功纂要範數觀通太極

拾遺形釋新言十餘種

侯峒曾李大經集序

張壽朋字冲猷南城人萬厯進士除刑部主事謫泰安

州同知終廬州府判所著有深息窩集

人物志

張以化字龍肝南城人萬厯甲午解元其領解試牘張

侗初奉為揣摩及癸丑成進士乃出侗初之門互讓

師弟子時為嘉話

府志

左宗郢號心源南城人萬厯進士由御史陞太常少卿

以所藏書三百七十種送入府學尊經閣自為記人
物志

涂國鼎字儀如新城人萬曆進士由行人擢吏部以清
通著歷陞刑部侍郎大獄多平反僉都御史易應昌
以直諫忤旨力為申救得減等陞南吏部尚書主計
典凡所激揚衆皆服之居官日少養親日多乞歸者
凡三卒於家

同上

張紹謙字道益南城人拔貢任寧海知縣興利除害見

義必為清糧畝定馬政甦驛遞著為良規又捐貲刻
方正學集以勸忠義崇祀名宦陞武昌同知卒著有

六如堂集

府志

鄧漢字遠遊新城人萬厯進士由內黃知縣擢河南道
御史累陞巡撫順天薊昌肩背神京於邊最稱劇魏
忠賢以其私人及司道某等囑漢訛論參降不少貸
連疏星變地震水災皆峻切指斥會御史林汝翥巡
城被閹家人拳擊漢代疏有寧死金堦不死奴婢等

語忠賢益怒織入楊左十五人中逮訊遠戍辰召

還卒所著有芙蓉樓大旭山房集薊門奏牘潯水集

廣農書行於世

人物志

按孫承宗所稱三十五忠鄧其一也生平著作甚

多尚有留夸館及南中紅泉諸集

趙師聖字我白南豐人由進士選庶吉士丙戌分較會

闈所取多名士位至九列者著有漱芳樓集

同上

鄭之文字應尼南城人萬曆進士授南工部主事歷郎

中出知真定府有遠山堂錦研齋集

明詩小序

王一言字民法南城人由進士令太湖調吳江邑賦甲天下當役者多破家奸民每詭匿紳戶一言大扁曰下民火耗易尅吾心天理難欺遷刑部郎疏爭三王並封國本由此定遷抗嚴副使有猾吏醉商探其重貲去而脫禍於騷稚子自誣服一言察其寃立釋之

官至應天府丞

人物志

黃文煒字德華南城人發解聯第年甚少授上海令除

弊折姦宿猾咋舌當水旱倭寇之後建倉儲穀捐俸
市米又請折草以恤荒區置義田以蘇糧役獻詞多

為人所傳

同上

周朝瑞字思永南城人萬曆進士為科臣泰昌初以慎
初三要諫忤旨降級時補官甫四日天啓初復故官
首疏參沈淮為邪黨後同楊左諸公以忤魏璫備受慘
酷斃獄中崇禎中追贈太僕寺卿福王時進謚忠毅
著有兩朝奏議

同上

按周朝瑞以臨清籍發解本貫則江西南城也白
志據府志及人物志采入

鄧鍊字文純南城人萬曆進士初入臺冢宰方因權璫
進將司大計劾罷之出按三吳閩越白故督王忬冤
還朝諫停磁造皆報可由司理御史至廷尉司風紀
幾二十年執法如山權力不能奪官至太僕卿同上

劉仰字弘字廣昌人萬曆進士知歙縣地不產絲絹例
徵船料抵輸商民大困仰歲却稅契羨錢數千緡代

輸奸民豪貴為地方患按治之無少徇風采大振擢
工部典試中州稱得士尋為其地叅政累官湖廣左
布政使伸起家竒貧後官方面清操如一子大年別

有傳

安志

陳所志號適菴廣昌人萬厯進士擢刑科給事劾沈一
貫之貪險孫如游入相非由枚卜熊廷弼功在封疆
三疏舉朝憚服以終養乞歸卒

同上

黃孫茂字雲來廣昌人天啓進士初令江山調邵陽以

忤宗藩左遷旋陞工部主事晉郎中出備兵登萊改
監軍道尋使朝鮮却餽遺數萬金島帥某謀變孫茂
適駐皮島密疏於朝被執遇害事聞贈太常寺卿子
作牧孝友鄉邑無間言以歲貢授分宜訓導

府志

蕭漢字雲濤南豐進士知鍾祥縣闖賊犯郢漢以忠義
誓衆鎮兵守外城者皆秦人與賊通城遂陷見執賊
知其廉欲降之乃置吉祥寺僧舍奪僧剃刀自刎賊
遣祭之斂以錦繡賊去門人歎曰吾師義不受汙肯

以賊衣斂乎悉易以常服事聞贈大理寺丞

人物志

按郢人魏繼宗有過吉祥寺弔蕭雲濤七言古體

一章凡七百餘言篇長不具錄

張紹登字振夫南城人萬曆舉人知應城縣賊來犯偕
訓導張國勛力禦却之邑侍郎王璠之子權結怨於
族黨怨家潛導賊復來攻國勛佐紹登力守會賊射
書索權權懼斬北關以出賊乘間登南城紹登還署
端坐堂上被殺賊渠數其忠以冠帶覆屍埋堂側

白志

鄧思銘字建侯南城諸生聞闕賊陷京師憤甚集其儕數十人習射學技擊思自効鬱不得志及建昌城破

死之

同上

饒陞字雲將南豐人工古文辭熟十三經註疏與同邑

趙師賓友善皆以博學稱先正李經綸為理學名儒

所著撰久秘弗彰陞請於督學侯廣成序而梓之

縣志

劉大年廣昌人崇禎進士耿介不苟以古道自任授兵部主事道過濟南值城失守死之贈光祿寺少卿賜

祭葬

安志

黃端伯字元公新城人崇禎進士歷寧波杭州推官福
王立授禮部主事乙酉五月南京破被執死之初端
伯舉甲子鄉試出同考官吳麟徵之門後端伯分校
南闈得楊廷樞為解首師弟三人後先皆死節云所
著有瑤光閣集

孔毓璣疏窗集

魯論字孔壁新城人天啓選貢授潁川同知時方寇警
論繕城池治器械練鄉勇民賴以安署天長霍邱二

縣陞福建藩幕未幾以世變隱居卒年八十有五所
著有四書通義周易卦義聞見錄詩古文十餘卷弟
訓字述之聚順一堂母馮氏早寡兄弟二人委曲養
志諸子皆以文行世其家學云

白志

黃中澹字元常廣昌人選貢授潮州通判擢荊州同知
改潮州以廉能薦內召值海寇熾粵紳合疏乞復中
澹知潮許之至則謀其魁單騎往諭寇數萬解散去
中澹三仕潮陽廉靜愛民民戴之如一日

女志

涂世名字仲嘉新城人偉幹修髯好慷慨言古今事天
啓丁卯舉人知龍谿縣漳州破死之長子常吉僕黃
薛黃揚王亨蔣山四人皆同日從死知府祝登元哀
之捐金歸其柩

鄒日章字美中南豐人崇禎中貢授當塗丞時烽煙四
起人多畏避日章運餉數千里外以賢勞為直指所
褒旋致仕家居孝友有陰德子臯庚午鄉薦

白志

湯紹中字恪素南豐人崇禎進士授行人司未任平生

篤孝友優游林壑自號長潛山人長子來賀每之官
誠曰爾惟冰檠自持以養吾志而已享年八十有六

卒

安志

李紹先字玉立廣昌人崇禎時貢授鹽亭令獻賊寇劍
南親知戒勿往紹先單車就道既至修戰具備守禦
戒兵盡髡其髮密約壯士入賊營曰我兵以禿來殺
諸髮者賊果却已而悉衆來攻城陷被執罵不絕口

遇害

同上

國朝

湯來賀字佐平南豐人明崇禎進士授揚州推官太監
王坤督鹽餉道府行屬禮來賀不為屈杜門求罷淮
撫史可法器重之考選刑科改禮部主事尋陞廣東
海道清理各屬獄囚減役微服徑抵州縣園扉審係
無辜者給照即釋香山有老囚羅姓來賀閱案知為
海賊羅亞福父歎曰罪人不孥况父乎縣令力爭謂
釋則累官來賀曰而忍戀一官而戕一命乎竟釋之

未幾亞福感釋父恩願領衆投誠來賀用為巡海向
導卒收其力在粵晉總制加兵部尚書不就歸為遺
民四十餘年當事聘入廬山主鹿洞教年八十二卒
學者稱惕菴先生弟來貢讀書砥行以孝友稱來賀
有蚤我十年生願待為師傅之語晚膺貢選教職不
就號拙逸老人來賀著有內省齋文集鹿洞邇言居
恒語錄及廣陵東粵政事諸書

徐芳字仲光南城人明崇禎進士授澤州知州以治行

第一徵後與友人鄧廷彬入山偕隱或出遊以資食則操技術以往不輕謁公卿平生著述甚多縣令苗蕃選刻其十之一名曰懸榻編

府志

何三省字觀我廣昌人明崇禎進士督廣東學政號得人歸卧溪山值山寇蹂躪以明哲遠害著述多不

傳

白志

劉大千字廣生廣昌人明崇禎丙子亞魁性至孝中年猶作嬰兒狀以娛二親事兩兄如事父順治壬辰會試

擬元以策中數字被斥士論惜之著有意園集古今

大譜藏於家

同上

章慥南城人明諸生隱居華子岡灌園養母與程山謝秋水論學有針芥之投程山每心折焉好讀史論衡精確發古人所未及言著有二十一史童觀集閱史偶談小論若干卷寧都魏叔子稱其發微闡幽大有

功於後學

黃采傳

邱觀字我生南豐人明末諸生後隱以著書為業利物

為心同邑謝秋水李仲闇甘健齋講學程山以觀能
持公論恤患難甚推重之平生著述凡十種名寒號
集尤留心醫學有濟生易簡六十四卷

白志

孔鼎字正叔新城諸生本至聖裔築室須眉峰研探易
傳及天官地理之學著楷園集八十餘卷

同上

魯啓聖字公望新城人恬淡謹飭及門之士皆有成材
或勸就試荅曰自度才智迂疎不足為時緩急兒輩
能讀父書不墜家聲足矣居鄉善俗抑然自下晚年

邑令延克鄉飲大賓力辭不赴以子瑗官司業贈如

子官

同上

謝文淳字秋水南豐人明諸生國變後建堂于邑治西程
山與同里李夢林邵睿明講學其中遠近人多師之
其學切近其行忠恕其言辭質厚中肯綮著書甚富
行世者講義數十篇日錄大學中庸切已錄程山十

則程山問答

同上

黃米字亮工南城人孩提時祖訓以小學格言及聖賢

姓名忻然聽受稍長言動不苟師事程山篤志力行
事父母醇孝祖父年八十餘承歡不懈繼母周有狂
疾尤委曲以事常於賓客前唾罵輒長跪負罪三十
餘年如一日及卒采年邁仍哀痛盡禮年八十四卒
著有性圖願學錄聖學彙編會語詩古文居家以小
學家禮倡引後進風俗為之一變與弟暉以學道相
勸勉子湘丙子舉人信豐教諭既歿豐人祠祀之同上
魏菁字明之廣昌人明季貢授中書勅往饒州清稽藩

下子孫尋挂冠歸移家水斗砦順治丁亥宵人通賊
將為變守將被擄且屠砦菁素善守將踉蹌往謁破
私產得千金為壽曰此父老所獻必破砦願不淫不
殺守將許諾所保全者千餘家菁家業自此凌替食
貧終身不悔也卒年七十四以子方泰貴贈通議大
夫魏和公墓志

甘京南豐人初為諸生後棄舉業與同邑曾曰都封濬
師事謝秋水值邑荒亂京請免荒稅均賦役賑飢平

寇人稱其經濟勝文章曰都濬俱以行誼篤學為鄉里矜式

白志

陳允衡字伯璣南城人為詩風流蘊藉名傾一時尤工評選其論詩以淡約真至為歸所選國雅暨愛琴館詩慰皆冲和恬澹之音為海內所重有詩集若干卷

府志

黃熙字維緝南豐人順治進士臨川教諭以親老乞終養告歸父年八十卒哀感路人三年蔬食乙卯奉母

居山砦母喪山居延燎熙撫棺大慟願以身同燼倏忽風返同邑謝秋水於人少所許可獨引熙為入室

弟子云

崇祀錄

梅遇字品章南城人順治舉人初諭奉新有土寇突發攻城令皇遽失措遇代督民兵登陴固守飛礮及左右傷數人不為懼寇又挾邪術翼兩笠飛登女牆遇麾卒斬之寇退城全擢陝西郿縣令縣經兵燹後田半荒蕪

國初設官興屯招墾胥吏乘間誣報逋賦日多遇力請
上官奏減之郿東南境為古橫渠渠流不溉西境遇
相勢開鑿凡四十里引渠環繞入渭由是附境荒土
皆成沃壤更設義倉捐建啓聖祠文昌閣歷官叙永
同知致政卒於家

陝西新志

何上如廣昌人好讀書絕意進取究心理學著書甚富
子楚玉克傳家學孫人龍康熙癸巳進士翰林院檢

討

白志

趙希階字方石南豐人康熙丙午舉人任公安縣地苦盜希階廉得其淵藪掩捕皆服辜斗湖決戶口流亡相地築月堤畫四里民恃以安堵乞歸著有未遠堂

集

同上

魯瑗字建玉新城人康熙乙丑進士選庶吉士授檢討癸酉典試山西所取五魁先後皆第南宮時稱得士兩任國子司業每集諸生講學論文亶亶不倦曾中不設城府生平無疾言遽色人自不敢干以私旋晉

侍講掌春坊轉太常少卿陞右通政引年致仕家居
杜門教子次第皆成名主教豫章書院學者稱西村
先生卒年七十八所著有侍直草粵遊草遂初吟硯
貽堂詩鈔共若干卷

同上

李長祚字天僕南豐人康熙甲戌進士知衡山縣詳革
賦役加派雜費勒碑以示久遠上司下其法各屬遵
為定式改調淑浦告歸卒于道

同上

胡銓字鑑亭新城人康熙丁丑進士知范縣下車首葺

學宮繼立義學值歲飢多方賑恤招復流亡又設立藥局以療病疫死者買棺掩殮范民感之卒祀名宦

同上

梅錫字允公南城諸生性孝友幼侍父病衣不解帶父歿哀毀骨立奉母盡孝養數十年如一日諸兄早世撫諸孤如己子康熙戊子歲饑捐貲設粥全活甚衆以子之珩貴贈中大夫詹事府少詹

崇祀錄

梁份字質人南豐人師事易堂彭躬菴魏叔子講經世

之學嘗隻身遊數萬里西盡武威張掖南極滇黔遍
歷燕趙秦晉齊魏之墟覽山川形勝訪歷代得失成
敗荒遐軼事著有成書為人樸摯強毅退守窮約至
老不挫年八十九卒所著有懷葛堂文集

姜宸英序

湯遽字聖游少為諸生孺慕奉親絕意進取肆力墳典
旁涉諸藝天文地理陰陽術數悉究其蘊耿逆叛時
奉二親避山中得全亂定後高尚終其身以子俊貴

贈翰林編修

彭任傳

魏方泰號魯峰廣昌人康熙甲子解元庚辰進士由翰林檢討歷官禮部侍郎為人端方清慎乙酉甲午主山東福建試皆稱得人丙戌督學雲南公明之頌溢於六詔蒐羅無遺文風丕振五督運西餉涉瀚海果壁台河以至實喇都蘭海萬里之地櫛風沐雨凡七年軍摺重務經理皆有方略年七十

子致仕有老成謹慎勞能素著之褒所著有行年錄

家

傳

彭期字彥遠南豐人康熙丁未進士內國史院撰文中
書以繼母告病歸色養備至家居數十年當事多世
誼交好絕無私謁閉戶嗜學校刊小學四書集註又
刻曾文定歐陽文忠集彙名人評點行世修學建橋
助賑凡有益於人之事無不力倡治家嚴肅鄉評尊
重稱為毅齋先生年八十九卒

家傳

江西通志卷八十四